

ADYAYA I

PURWAKA

1.1 Dadalan Pikobet

Peplajahan basa Bali pinaka pelajaran sane ngeranjing ring muatan lokal sane kapolihang ring samian jenjang sekolah. Peplajahan basa Bali puniki nenten prasida lempas ri sajeroning kawagedan mebasisa sekadi kawagedan ngwacen, kawagedan mabebaosan, kawagedan mirengang miwah kawagedan nyurat. Saking petang kawagedan mebasisa punika sane pinih mawiguna ring wewidangan pengajah-ajah inggih punika kawagedan nyurat (Ajar et al., 2020). Mawinan kawagedan nyurat puniki prasida ngangganin samian kawagedan sane wenten ring jadmane, kakawitin antuk nelebin kawagedan ngwacen lan mabebaosan miwah kawagedan nyurat puniki prasida ngurukang kewagedan mapikayunan sane becik.

Sinalih tunggil peplajahan muatan lokal sane kapolihang ring sekolah inggih punika peplajahan nyurat *cerpen*. Ring sekolah SMP Negeri 3 Sawan peplajahan muatan lokal sampaun nganutin kawentenan *kurikulum anyar* sekadi *kurikulum merdeka*. Ring keputusan *Menteri Pendidikan, Kebudayaan, Riset lan Teknologi* Nomor 56/M/2022 ngeninin indik *struktur kurikulum merdeka* ring satuan *pendidikan* ngewewehein muatan lokal sane katetapang olih *pemerintah daerah* manut ring *karakteristik daerah*. Pengembangan *kurikulum merdeka* sareng muatan lokal ngicenin genah majeng ring sekolah lan daerah antuk

ngembangangmuatan lokal miwah prasida mikolihang peplajahan sane becik majeng ring wewidangan lan para sisia. Kawentenan kurikulum merdeka puniki kaaptiang mangda prasida ngicenin kemahardikan majeng ring sekolah, guru lan sisia rikala ngelaksanayang peplajahan sane anut sareng kebutuhan.

Nyurat *cerpen* pinaka sinalih tunggil kawagedan nyurat sane kadasarin antuk materi sastra. Wenten tiga materi sane mapai ketan antuk sastra inggih punika prosa, puisi, lan *cerpen*. *Cerpen* rumasuk ring karya sastra wangun prosa. Manut Nurgiyantoro (2010) *cerpen* inggih punika cerita fiksi sane ngwangun prosa cutet sareng unsur ceritanyane wantah uleng sareng siki paindikan manten. Nyurat *cerpen* inggih punika satua cutet sane maduwe daging cerita ring pikayunan pengawi. *Cerpen* dados sarana sane anut kaanggen nglaksanayang utawi nglatih pikayunan sesuratan sane becik.

Peplajahan nyurat *cerpen* ring kelas VII E SMP Negeri 3 Sawan maduwe pikobet. Madasar antuk napi sane kacingakin lan pikoli wawancara, sang sane nilikin sareng guru bahasa Bali ring SMP Negeri 3 Sawan, kapolihang pikobet saking sisia kelas VII E ring kawagedan nyurat *cerpen* bahasa Bali. Ring pikoli cecingak lan wawancara ngawinang wenten pikayunan majeng indik pikobet punika metu awinan para sisiane kirang seneng sareng peplajahan bahasa Bali utamane rikala sisia kanikain nyurat bahasa Bali mawinan sisia meweh ngamedalang pikayunannyane ring wangun sesuratan miwah guru kirang nyayagayang *media* peplajahan sane prasida ngaryanang peplajahan dados peplajahan sane ngulangunin taler ngwantu sisia ngemolihang pikayun sesuratan. Parindikan punika ngawinang sisia med lan nenten madue pikayunan rikala nyurat.

Kawagedan nyurat nenten pinaka kawagedan sane elah kapolihang.

Parikrama nyurat patutnyane kaanggen dados kasenengan sane sesai kalaksanayang. Manut Suastika (2018) Kawagedan nyurat pinaka kawagedan sane patut kadruenang ring widangan pengajah-ajah. Wenten teges taler pikoli tetilikan sane sampun nujuang indik mabuatnyane kawagedan nyurat inggih punika prasida ngawangun papineh, nincapang kawagedan mabebaosan, taler nincapang pikoli peplajahan sane becik (Haryanto, 2009). Nyurat nenten ja pinaka sarana ngwetuang daging pikayunan kemanten, nanging prasida taler kaanggen nyiriang kawagedan jatma (Sahno, 2022). Nyurat prasida ngawinang para jatmane maosang pikayunan taler pabesen sane tatas tur manut sareng reruntutane, sane prasida ngawinang elah pangwacen anggen nguningin babaosan sane katekedang (San'ani, 2022). Punika mawinan nguningin kawagedan nyurat pinaka bekel sane pinih mautama anggen benjangan rikala mungkah widang kawagedan maparilaksana sane becik.

Anggen nepasin pikobet punika, guru ngawigunayang *media* peplajahan sane becik taler prasida ngawinang sisia ngerereh pikayunan nyurat sane anut. Madasar antuk pikobet punika panilik mautsaha ngamecikang *media* peplajahan sane kaanggen rikala ngajahin nyurat *cerpen*. Pamilihan *media* peplajahan sane pinaka palihan sane sarat rikala ngwantu guru ngicenin materi mangda sayan nudut kayun lan kreatif. Sang sane nilikin pacang nganggen *media* gambar *berseri* antuk *flipbook* anggen ngajahin sisia nyurat *cerpen* bahasa Bali. *Media* gambar *berseri* inggih punika gambar sane ngwangun reruntutan satua (Sarudi, 2018).. *Flipbook* inggih punika buku digital sane medaging teks, gambar, lan video (Sulistyorini 2019). Gambar *berseri* lan *Flipbook* pacang kakaryanin becik pisan mangda prasida maktayang satua cutet antuk bahasa Bali sane madaging urutan gambar sane ngulangunin tur manut reruntutannya. Pikoli sane kaaptiang ring tetilikan puniki

mangda prasida nincapang pikolih melajah sisia ring nyurat *cerpen* miwah ngicenin pikayunan (*ide*) nyurat majeng ring sisia mangda seneng lan ngaat rikala melajah nganggen *media* punika. Tetilikan puniki kawatesin ring penincapan kawagedan nyurat *cerpen* ring basa Bali. Nganggen *media* sane ngulangunin prasida nincapang ngaat melajah para sisia.

Manawi wenten makudang-kudang tetilikan maosang indik *motivasi* lan minat sisia prasida ngemargiang eedan peplajahan sane pinih mautama (Fap & Hardini, 2021). Ring parindikan puniki, teges *motivasi intrinsik* prasida kalaksanayang, sane maosang indik sisia pacang pinih seneng rikala ipun ngemolihang pikolih sane becik saking parikrama malajah. Nanging manut pikolih wawancara dumunan, sisia kirang seneng sareng peplajahan bahasa Bali santukan ipun nenten nyingakin kawigunan ring kauripan sadina-dina. Guru bahasa Bali ring SMP kirang nyayagayang *media* peplajahan sane prasida ngwantu para sisia ngicenin pikayunan nyurat. *Media* peplajahan sane becik prasida nincapang rasa seneng sisiane ngemargiang peplajahan lan prasida nincapang kawagedan nyurat bahasa Bali.

Lianan ring punika kawigunan *teknologi* ring pengajah-ajah prasida ngemolihang cecingak sane pinih mautama ngeninin indik tata cara nepasin pikobet peplajahan para sisia. Saha ngawigunayang *teknologi* pengajah-ajah, sekadi *aplikasi* peplajahan bahasa Bali sane mapaiketan anggen nyurat, sisia prasida akeh ngemolihang eedan peplajahan lan rumasa pinih kadukung anggen ngembangang kawagedan nyurat para sisia (San'ani, 2022). *Media* peplajahan medasar antuk *teknologi* taler prasida ngwantu guru rikala ngaryanang kawentenan melajah sane pinih becik lan mapaiketan majeng ring para sisia. Sekadi samian pikobet

kawagedan nyurat ring bahasa Bali, sisia kelas VII E ring SMP Negeri 3 Sawan prasida katepasin antuk ngukuhang ngaat ring ragan sisiane nganggen *media* peplajahan sane becik tur medasar antuk *teknologi*. Guru prasida ngelaksanayang peran sane utama rikala ngaryanang wewidangan melajah sane medasar antuk manah lan ngicenin dukungan sane kapatutang majeng ring sisia ritatkala madue pikayunan nyurat.

Tetilikan sane kalaksanayang olih Mukrima (2016) maosang indik gambar *berseri* becik anggen ngwantu sisia nincapang kawagedan nyurat sisia ring kelas XII. Gambar *berseri* prasida ngawinang sisia elah ngemolihang pikayunan rikala nyurat (Zainal; 2022). Lianan ring punika ngawigunayang gambar *berseri* sane kabaosang olih Sahno (2022) prasida ngawinang peplajahan dados becik. Antuk *media* peplajahan *elektronik*, tetilikan sane kalaksanayang olih Tafonao (2018) sane nujuang indik sisia rumasa liang lan sarat/ ngaat nyarengin peplajahan rikala kajahin nganggen *media* peplajahan *elektronik*. Madasar antuk pikobet sane kadruenang olih sisia, kaluihan sane wenten ring gambar *berseri* lan *flipbook* kaaptiang mangda prasida nincapang kawagedan nyurat *cerpen* sisia kelas VII E SMP Negeri 3 Sawan ring nyurat *cerpen*.

Malarapan antuk pikobet sane kakeniang ring SMP Negeri 3 Sawan punika, tetilikan puniki kakaryanang matetujon prasida nincapang kawagedan nyurat *cerpen* nganggen *media* gambar *berseri* ring *flipbook*. Yadiastun akeh wenten tetilikan sane ngelaksanayang tetilikan ngeninin indik tata cara nincapang kawagedan nyurat *cerpen* nganggen *media* gambar *berseri* nanging durung wenten sane ngelaksanayang tetilikan sane nganggen *media* gambar *berseri* ring *flipbook*.

Tetilikan puniki pacang ngutamayang penglimbak kawagedan sisia kelas VII

E SMP Negeri 3 Sawan antuk nyurat *cerpen* ring bahasa Bali, santukan *cerpen* prasida nuntun para sisia maosang pikayunan, imajinasi, lan wirasa sane nenten kaiket (Zulfa, 2018). Antuk ngasah kawagedan nyurat *cerpen*, kearepang sisia prasida ngalimbakang kawagedan bahasa Bali antuk ngawigunayang *media* gambar *berseri* antuk *flipbook* puniki mangda prasida ngwantu sisia rikala nelebin undagan *cerpen* lan prasida ngametuang tur ngaryanin satua sane ngangobin tur nudut pikayunan. Lianan ring punika *flipbook* puniki taler pacang ngicenin eedan pabligbagan sane elah. Sane ngawinang sisia prasida nguningin napi sane kaperluang lan prasida nglimbakang kawagedan nyurat sane jati. Malarapan antuk tetilikan puniki sisia kearepang mangda samian seneng malajahin nyurat bahasa Bali, taler prasida nepasin pikobet sane sedurungnyane ngalangin kawagedan nyurat basa Bali. *Media* peplajahan sane becik lan kawentenan *teknologi* kaarepang prasida maktayang kabecikan ring utsaha nincapang kawagedan sisia nyurat basa Bali.

1.2 Ngrereh Pikobet

Nganutin dadalan pikobet ring sor wenten pikobet sane kapanggihin, minakadi: 1) Sisia durung tatas ngaresepin peplajahan nyurat *cerpen*. 2) Sisia kirang seneng sareng peplajahan basa Bali utamannyane rikala kanikain nyurat ring basa Bali santukan nyurat pinaka kawagedan mebasisa sane meweh sane ngawinang peplajahan nyurat puniki nenten kesenengin. 3) Peplajahan nyurat *cerpen* ring SMP Negeri 3 Sawan durung ngamolihang pikolih sane akeh utawi durung nincap. 4) Guru kirang nyayagayang *media* peplajahan sane prasida ngawinang peplajahan

dados pinih becik taler prasida ngwantu sisia anggen ngamolihang pikayunan nyurat.

1.3 Ngwatesin Pikobet

Sekadi tetilikan sane kelaksanayang panilik nureksain malih pikobet sane sampun karereh. Pikobet punika kewatesin santukan wenten makudang-kudang parindikan, minakadi tetilikan kebande antuk galah, ngicenin selah majeng ring panilik siosan mangda nyangkepin saha ngemargiang tetilikan manut kaweruhan widya sane lianan. Pikobet sane kewatesing inggih punika: (1) Pidabdab peplajahan nganggen *media* gambar berseri antuk *flipbook* sisia kelas VII E SMP Negeri 3 Sawan (2) *Media* gambar berseri antuk *flipbook* prasida kaanggen nincapang kawagedan nyurat *cerpen* ring sisia kelas VII E SMP Negeri 3 Sawan (3) Panampen sisia kelas VII E SMP Negeri 3 Sawan majeng peplajahan nyurat *cerpen* nganggen gambar berseri antuk *flipbook*.

1.4 Bantang Pikobet

Mawit saking dadalan pikobet ring ajeng prasida katlatarang bantang pikobet sane dados tetuek inggih punika:

1. Sapunapi pidabdab peplajahan nganggen *media* gambar *berseri* antuk *flipbook* sisia kelas VII E SMP Negeri 3 Sawan?
2. Napike *media* gambar *berseri* antuk *flipbook* prasida kaanggen nincapang kawagedan nyurat *cerpen* ring sisia kelas VII E SMP Negeri 3 Sawan ?

3. Sapunapi panampen sisia kelas VII E SMP Negeri 3 Sawan majeng peplajahan nyurat *cerpen* nganggen gambar *berseri* antuk *flipbook*?

1.5 Tetujon Tetilikan

Nganutin bantang pikobet sadurungnyane kapolihang tetujon tetilik sekadi puniki.

1. Mangda uning indik pidabdab peplajahan nganggen *media* gambar *berseri* antuk *flipbook* sisia kelas VII E SMP Negeri 3 Sawan.
2. Mangda uning indik *media* gambar *berseri* antuk *flipbook* prasida kaanggen nincapang kawagedan nyurat *cerpen* ring sisia kelas VII E SMP Negeri 3 Sawan.
3. Mangda uning indik panampen sisia kelas VII E SMP Negeri 3 Sawan majeng peplajahan nyurat *cerpen* nganggen gambar *berseri* antuk *flipbook*.

1.6 Kawigunan Tetilikan

Pikolih tetilikan puniki keaptiang mangda ngicenin kawigunan sekadi napi sane keaptiang, sekadi kawigunan teoritis lan kawigunan praktis.

1.6.1 Kawigunan Pamucuk (*Teoritis*)

Tetilikan puniki pacang ngicenin kawigunan sane sarat antuk nganggen teges *media* peplajahan gambar *berseri* antuk *flipbook*. Tetilikan puniki pacang ngicenin wantuan sane becik tur nguningin gambar *berseri* antuk *flipbook* anggen ngwantu sisia ring peplajahan nyurat.

1.6.2 Kawigunan Panglimbak (*Praktis*)

Kawigunan panglimbak ring tetilikan puniki pacang ngicenin wantuan *media peplajahan* marupa gambar *berseri* nganggen *flipbook* sane becik, kawigunan panglimbak saking tetilikan puniki karentetang sakadi ring sor:

- a. Majeng ring Para Sisia

Majeng ring sisia tetilikan puniki pinaka silih sinunggil utsaha ngwantu sisia sane nemuang pikobet rikala nincapang kawagedan nyurat.

- b. Majeng Guru Bahasa Bali

Tetilikan puniki mangda kawigunayang olah guru anggen nincapang kawagedan nyurat *cerpen* sisia nganggen *media* gambar *berseri antuk flipbook* ring *peplajahan*.

- c. Majeng Panilik sane Lianan

Tetilikan puniki kadadosang dasar ngamargiang tetilikan sane pateh lan tetilikan sane tiosan. Taler dados anggen antuk imba ritatkala ngamargiang tetilikan panglimbak peplajahan nyurat *cerpen* nganggen *media* peplajahan.